



Terenga 2: Hōtaka 12 – Kei = Kaua e...

Kei ngā aho tāmiro o ngā pū harakeke huri noa i ngā motu, whakapiri mai anō ki te hōtaka i hangaia ai hei whakawhānui i ō tātou pūkenga whakapuaki i tō tātou reo.

Hei Mahi Whakarongo

He whaea, he kuia ngā kaikōrero i runga i te kiriata kua tīpakohia hei whakarongo mā tātou. Ko tētehi kua ngaro i te tirohanga kanohi, Te pō i a koe, e kui Te Aue, te ringa rehe o te whare pora o Hine-te-iwaiwa. Haere ki te huinga o te kahurangi oti atu ai koutou. Kia whakahokia mai ngā whakamahuki ki te ao mārama, ko te kaikōrero tuarua i runga i te kiriata ko Te Ripowai Higgins nō Tūhoe. Anei ngā pātai hei whakautu mā koutou:

1. He aha tā Te Papa whakatūpato ki te hunga wāhine?
2. He aha tā Te Aue whakahoki?
3. He whakatūpato anō tā Te Ripowai?

He Whakamārama

He tohutohu te aronga o te rā. Kua waia kē koutou ki te whakamahi i te tohutohu 'Kaua'.

I te rā nei ka whāia te whakamahinga o tētehi kupu kotahi e ōrite nei tāna mahi ki tērā o te kupu 'Kaua'.

Kei + tūmahi/tūāhua = Kaua e + tūmahi / tūāhua

Kei haere koutou ki te taha o te awa. } *Don't go to the river.*

Kaua koutou e haere ki te taha o te awa. }

Kei pōhēhē kōrua kua mutu te mahi. } *Don't assume the work is finished.*

Kaua kōrua e pōhēhē kua mutu te mahi. }

Tirohia hoki ngā tauira o te kiwaha nei, 'kei noho ka...' hei whakakaha i te tohutohu 'kaua':

Kei noho...ka... = Kaua rawa e ...

Kei noho koe ka kanga mai. *Don't you dare swear at me.*

Kei noho koutou ka haere ki korā. *Don't even think about going over there.*

Hei Manatu

Mō taku hē, mō taku hē!

He kōrero tēnei hei whakamāmā i ngā whakaaro o te tangata ki tāu mahi kāore i tika, ki tō hapa rānei.

Ka rangona whānuitia te 'aroha mai' hei tono i te tangata kia māmā ai ana whakaaro ki a koe. Heoi, he wā ka hāngai ake tēnei kōrero. **Mō taku hē, mō taku hē!** Ki te toaitia pēneitia he tohu tēnā o tō mōhio kua hē koe, ā, ko tāu e whai nei kia māmā mai te tangata ki tēnā mōhiotanga ōu.

"Aiii! Kāore au i mihi atu ki a koe i tō rā whānau. Mō taku hē! Mō taku hē!"

Hei Mahi

Whakawhitihia ēnei rerenga kia tīmata kē ki te kupu 'Kei'

1. Kaua e noho ki konā tohutohu mai ai!
2. Kaua e kōrero pērā ki ngā tamariki.
3. Kaua e whiuwhiu noa i ā koutou rāpihi ki te papa.

Whakamāoritia ēnei rerenga:

4. Don't you dare drive that car.
5. Don't even think about moaning.

Whakautu:

1. Kei noho ki konā tohutohu mai ai. 2. Kei kōrero pērā ki ngā tamariki. 3. Kei whiuwhiu noa i ā koutou rāpihi ki te papa. 4. Kei noho koe ka hautū i tērā waka. 5. Kei noho koe ka komekome/amuamu.